

Lëtzebuerg, den 3. Februar 2016

Här President,

Esou wéi d'Chambersreglement et virgesäit, bieden ech Iech, dës **dréngend parlamentaresch Fro** (Art. 81) un den Här Premierminister däerfen ze stellen.

Groussbritannien bereet e Referendum vir, an deem d'Bierger sech müssen entscheiden, aus der Europäescher Union auszutrieden oder dran ze bleiwen. An dem Kader huet, en Dënschdeg, den 2. Februar, de President vum Europäesche Rot mam Premierminister vu Groussbritannien e Projet fir en Accord ausgeschafft, deen nei Regele virgesinn.

Et sinn dës:

- *eng „Noutbrems“ fir zäitweileg an ënnert bestëmmte Viraussetzunge sozial Hëllef fir intra- europäesch Migrante kënnen aussetzen;*
- *de Subsidiaritéitsprinzip soll verstärkt gi mat engem System vun der roudere Kaart, mat deem eng Majoritéit vun national Parlamenter kënnen europäesch Legislatiounen blockéieren;*
- *eng Dispositioun, datt d'Rechter vun de Memberstaten, déi net am Euro sinn, besser berücksichtegt ginn;*
- *d'Kompetitivitéit vun de Memberstate verbessert gëtt, andeems d'Legislatiounen vereinfacht ginn a Grenze fir den Handel erwächt falen;*
- *Groussbritannien soll net méi verpflichtet si fir eng weider politesch Integratioun an d'Europäesche Union.*

Iwwert dëse Projet fir en Accord soll am Europäesche Conseil vum 17. an 18. Februar entscheed ginn.

Dowéinst wéilt ech dem Här Premierminister dës Froe stellen:

- 1) *Wéi eng Haltung wäert d'Lëtzebuerger Regierung op deenen eenzelne Punkten anhuelen?*
- 2) *Deelt den Här Premierminister d'Meenung, datt eventuell Konzessiounen, déi d'Regierung vu Groussbritannien negociéiert huet, müsse fir all Memberstat gëllen?*
- 3) *Op wéi e Wee géifen déi eenzel Moosnamen ëmgesat ginn (Ännerung vum Traité, Reglementer, Direktiven...)?*
- 4) *Wéi eng Konsequenzen hätt en Austrëtt vu Groussbritannien op Lëtzebuerg, am allgemengen an speziell op d'Finanzplaz?*
- 5) *Wéi eng Konsequenze kéimen op déi europäesch Institutiounen zou, déi de Siège zu Lëtzebuerg hunn, och wat Beamten aus Groussbritannien betrëfft?*

Mat déiwem Respekt



Fernand Kartheiser
Deputéierten